

戇狗想食豬肝骨

前幾日去市場割豬肉，豬砵个頭家看佢買買摺盡多樣，就當阿莎力割一坵豬肝送佢。當久毋識食豬肝咧！佢暢樂樂環等豬肝轉到屋下，俵仔一看著就講：「豬肝係豬仔解毒个器官，豬仔食个飼料可能有生長激素、瘦肉精，最好毋好食。」心白續等又講：「有年紀个人咧，腹內做毋得食忒多。」你一句、佢一句，講到佢毋知愛摻這坵豬肝拂忒好抑係煮來食好。

記得佢細人仔時節，大家毋係日日有肉氣好食，佢姆長下會準備一、兩樣私伽菜分佢婆摻佢公食，毋係豬肝湯，就係肉散湯。第一擺看著桌臂个豬肝湯，一坵一坵个豬肝還錫人哪！佢摻老弟、老妹毋知頭天，相爭愛挾來食，佢姆黏皮咄佢兜講：「恁無規矩，戇狗想食豬肝骨得似！」細人仔平時想愛食豬肝，就像戇狗想食豬肝骨樣。佢婆惜孫，會挾幾坵分孫仔、孫女食，佢最惜佢，總係偷偷仔多挾幾坵在佢碗肚。在該時開始，豬肝在佢心肝肚係最高貴个食物。

無想著以後，「戇狗想食豬肝骨」這句話，長下響在佢耳空臂。因為從細佢婆就惜佢、縱佢，愛麼个就有麼个，毋識失望過。到佢婆過身後，就無恁好空咧，尤其佢座大，下頭有五個老弟、老妹目激激看等，佢姆對佢个要求，總係用「戇狗想食豬肝骨」來應佢。毋好講「豬肝骨」這種無个東西，就連豬肝乜高高在上，閒時間節也難食著，所以佢姆應佢這句話，代表佢係戇想啦！毋過，佢逐擺還係「鴨嫲嘴罔吮」，希望有一、兩擺做得合意。唉！該願豬肝个日仔啊！

頭擺無恁豐湧个年代，豬肝做得補血，係盡有營養个食物，這下个人山珍海味食多，營養過多，無麼个人愛食咧！自然豬肝个價錢斯跔等便宜，幾十銀就買一大坵，還長下分店頭家拿來搭秤頭用。佢想就算有「豬肝骨」，好命个狗也可能毋愛食咧！看等桌頂个豬肝，想起頭擺个種種，煮來食好啦，續摻佢對佢婆个思念共下吞落肚。

作者：張美容

☆詞彙學習☆

【戇狗想食豬肝骨】ngongˋ gieuˊ siongˊ shidˋ

zhuˋ gonˋ gudˋ：比喻痴心妄想。

【暢樂樂】tiongˋ lagˋ lagˋ：很高興。

【肉氣】ngiug hiˋ：肉類。

【私伽菜】siiˋ kiaˋ coiˋ：私房菜。

【肉散湯】ngiug sanˊ tongˋ：碎肉湯。

【黏皮】ngiam pi：立刻。

【座大】co+ tai+：排行較年長。「座」指所居、所處的位置。

【目激激】mug gid gid：眼睜睜。

【戇想】ngongˋ siongˊ：妄想。

【願豬肝】ngienˋ zhuˋ gonˋ：對豬肝垂涎三尺。

【搭秤頭】dab chinˋ teu：陪襯、附贈。

☆文法學習☆

【……得似】……ded sii+：判斷句的句末加上「得似」，表示判斷或肯定的意味。

例1：有車毋曉坐，戇仔得似。（有車不會坐，真是呆子。）

例2：係佢毋曉得似，毋係佢毋肯摻你搵手。（是我不會，不是我不肯和你幫忙。）